

th'agam? Cha mhisid i idir beagan 'na mheirg a thoirt dith, is ma leanas mi air a sgrìobhadh leis an inneal a tha 'nam dhòrn an geartair tha dùil agam gum faigh mi sìlean air choireiginn dha'n mheirg—'s ma tha mheirg 'na sìleanan—a fhroiseadh dhith.

Cha n-eil latha nach bi mi leughadh na Gàidhlig—a dh'innse na firinn 's e bhith 'ga leughadh as na lathaichean gruamach-sa bu thrìan beatha dhomh—ach 's fheudar dhomh aideachadh gura beag a sgrìobh mi dhith bho chionn ùine—co dhiu as mo cheann fhéin. Neo-ar-thaing nach robh mi dìchiollach gu leòir gus a h-uile smodal, ruinn no bàrdachd, druideart no sgialachd, a chluinninn a chrìnn-eachadh gu cùramach 's a chàradh sìos ann an leabhraichean as an robh mi gleidheadh a h-uile cuid dhiubh sin, ach tha bliadhna no dhà no trì no ceathar, ma dh'fhaidte, o dh'fhiach mi ri fiù aona cheathramh fhéin de laoidh a chur sìos gu dòigheil a Gàidhlig. Cha n-ioghnadh ise a bhith gu math meirgeach leis an sin. Ach am farmad a bhios agam ris na daoine aig am b' Gàidhlig shiubhlach bhlada, 's ri ruith cho réidh aca 's i cho binn ri ceilearadh na h-uiseig, 's cho milis ris a' mhill a bhios an seillean srinach a' deoghal o chuach nan dithean a's t-foghar. Cha n-eil comas air. A dh'aindhéoin dichill, 's fheàrr cleachdadh na h-òige. 'S ann an sin bha mise 'n call —'gam thogail ann am baileachan eadar a bhith Gallda agus Gàidhealach, gun uiread is a' Phaidir fhéin do dh-ùrnaigh, gun iomradh idir air facal sgoileadh, 'ga fhaighinn an Gàidhlig, ach 'gar caibhleachadh bho mhochran gu feasgar ann an sgoil na Beurla—ann an sgoil na Laidinn 's na Greugais nan togramaid—'s a' chànaid bu bhrìogh-mhoire 's bu dùthchasaich' dhuinn 'ga dìobradh. Tha bhlàth sin ann—an car cam a chuir a' Bheurla 'nam bhial an tràth sin, tha e ann fhathast, agus bithidh. Cha bhi mise coingeis gu bràth air a' Ghàidhlig air a shàilibh sud, 's ge b'oil le m' chridh' 's le m' sgamhan, bithidh boladh breun glagarsaich mì-thlachdmhor an t-Sasunnaich ghlais air a' Ghàidhlig a dh'fhàg blas is sgoil na Beurla cho gagach, cho stacach, cho rag-bhriathrach ann am cheann-sa.

(*R'a leantuinn*)

Taing Airson Dhealbhanan

Fhuair sinn mòran de na dealbhannan a tha anns an leabhar so, saor agus an asgaidh, bhon fheadhainn a leanas. Bu mhath leinn taing chridheil a thoirt dhoibh uile.

Cutadh an sgadain an Steornabhagh, Valentine's, Peairt.

Traigh Dhornoich - - - Ealasaid Sutter, Glaschu.

Coilleag a Phrionnsa agus

Maighstir Ailean - - Mgr. Blaikie.

An Fhadhail a Tuath agus

Cleas Ur air Seann Obair - Am B.B.C.

Tigh Mor an Dealain - -

Thomas Moodie.